



DECLARATION

DV ROY, PORTANT
interdiction de la Cour de Par-
lement de Bordeaux.

Du douziesme Juillet 1649.

LOVIS PAR LA GRACE DE
DIEV ROY DE FRANCE
ET DE NAVARRE. A tous ceux
qui ces presentes verront. Salut : Les entre-
prises faiçts, sur nostre autorité par les gens
tenans la Cour de Parlement de Bordeaux ,
nous auoient donné assez de sujet de leur faire
ressentir les peines que meritoit leur faute.
Mais le desir que nous auons tousiours eu de
conseruer nos sujets dans le repos , & de re-
trancher toutes les occasions qui pouuoient
l'interrompre, Nous auoient portez à tenter
toutes voyes de prudence & de bōté pour ra-
mener les Officiers de nostre Cour de Parle-
ment dans leur deuoir, plustost que de les trai-

ter avec la feuerité que meritoit leur mauuaise
 conduite : Cette consideration nous auoit
 fait resoudre d'enuoyer le sieur Dargenson
 Conseiller ordinaire en nos Conseils pour
 leur faire cognoistre nos bonnes intentions
 d'oublier tout ce qui s'estoit passé, & les por-
 ter à se departir des desseins qu'ils auoient as-
 sez fait cognoistre d'entreprendre sur nostre
 autorité : Mais au lieu de receuoir la grace
 que nous leur presētions, ils se sōt portez avec
 plus de passion à continuer d'exciter les mou-
 uemens qu'ils auoient preparez de longue
 main & quel'on a veu naistre tout d'un coup,
 avec tant de violence, que si nostre tres cher
 & bien amé Oncle le Duc d'Espernon n'eust
 opposé nos armes avec le courage, la valeur
 & la prudence qu'il a fait paroistre en toutes
 occasions pour nostre seruice, la rebellion se
 fut renduë puissante, & eut estendu ses forces
 dans toute la Prouince : lors que nous consi-
 derōs que tous les mouuemens ont esté exci-
 tez par les Officiers qui portēt les marques de
 nostre autorité souueraine, & qui sont pre-
 posez pour rendre la iustice à nos peuples :
 Nous ne pouuons sans estonnement penser
 que

que cette rebellion si iniuste & si monstrueuse soit leur ouurage. Nous auons fait à cette Compagnie toute la grace qu'elle pouuoit esperer de nous, en luy donnant entr'autres, & auant qu'elle ne l'eut demandé, le droit annuel, qui assure leurs charges : Neantmoins lors qu'on luy a enuoyé la Declaration du mois d'Octobre qui auoit esté concertée avec nostre Cour de Parlement de Paris, au lieu de l'enregistrer, ils ont ordonné des cōmissaires pour examiner les impositions qui se leuoient dans la Prouince, pretendans supprimer celles qu'ils n'auoient point verifiées; & en suite ils ont fait deffences de leuer les deux escus pour tonneau de vin qui se leuoit dans la ville de Bourdeaux; Il est vray que l'Arrest porte que ce seroit sous nostre bon plaisir; Mais apres leur auoir fait connoistre que l'estat present de nos affaires ne permettoit pas que cette imposition fut entierement supprimée, ils ont par vn mespris de nostre volonté demeuré dans la premiere resolution. Ce n'estoit pas assez d'auoir pris connoissance d'une imposition qui n'estoit pas de leur iurisdiction, ils ont voulu passer plus auant, & fai-

B

sant les Souuerains, ils ont reuoqué l'establis-
 sement de la Cour des Aydes, leur interdis-
 sant la fonction de leurs charges, comme s'ils
 auoient le pouuoir de disposer de nostre puis-
 sance, & d'abolir ce qui a esté si iustement or-
 donné par le Roy defunct nostre tres-honoré
 Seigneur & Pere, & supprimé des Officiers qui
 ont exercé leurs charges pendant vingt an-
 nées sous nostre autorité, à laquelle seule ap-
 partient la creation, & suppressiō des Offices.
 Il ne faut pas trouuer estrāge toutes les actiōs
 déreiglées de cette Cōpagnielors qu'ils ont
 ouuertement entrepris d'vsurper vn pouuoir
 qui n'appartient qu'aux Roys seuls. Aussi leur
 conduite s'est portée à cet excez, qu'apres s'e-
 stre asseurez des esprits des peuples par les
 descharges des impositions qu'ils leur auoiēt
 donnees, ils les ont portez à prendre les armes
 sous les commandemens de Chambaret leur
 General, & voyant que nostredit Oncle le
 Duc d'Espernon, auoir fait esloigner nos for-
 ces, sous l'assurance qu'ils auoient donnée de
 mettre les armes bas, de faire cesser tous actes
 d'hostilité: Ils firēt sortir leurs troupes de Bor-
 deaux sous le commandement dudit Cham-
 baret assisté de cinq Conseillers par l'ordre

du Parlement. Ils attaquèrent la place de Libourne deffendeuë par nos armes, & donnerent les assauts comme contre vne place ennemie, & en suite ils entreprirent ouuertement de combattre nos troupes commandées par nostre dit Oncle le Duc d'Espernon qui s'estoit rendu en diligence pour le secours de Libourne, & bien qu'il n'eust que la septiesme partie de ses forces, il emporta la victoire avec tant d'auantage, que ces rebelles furent entierement deffaits, & leur General tué sur la place. Il y auoit apparence que les Officiers de nostre dite Cour de Parlement ouueroient enfin leurs yeux pour condamner eux-mesmes la rebellion qu'ils auoient formée. Mais au contraire apres la perte de Chambaret, ils ont fait choix du Sieur de L'vsignā pour nouveau General de leurs troupes. Et si les habitants de nostre ville de Bordeaux eussent suivy leurs mouuements, la rebellion seroit encore puissante. Ils ont fait connoistre qu'ils estoient tousiours dans leurs mauuaises intentions, puis que la Cour des Aydes s'estant re-stablie, suiuant nos ordres, ils cassent l'Arrest de leur re-stablissement comme dōné par per-

sonne priuée sans pouuoir ny iurisdiction ;
 font deffence à toutes sortes de personnes d'y
 defferer, & que sous nostre bon plaisir, l'Ar-
 rest qu'ils auoient donné de l'interdiction de
 cette compagnie seroit executé selon sa for-
 me & teneur, avec deffences ausdits preten-
 dus Officiers, & tous autres d'y contreuenir,
 sous les peines portées par ledit Arrest. Leur
 violence a passé bien plus auant, lors qu'ils
 font deffences à toutes sortes de personnes
 de visiter nostredit Oncle le Duc d'Espernō,
 que les habitans se remettans dans leur de-
 uoirs, auoient receu dans nostredite ville de
 Bordeaux. Et pour plus grande marque de
 l'auersion qu'ils auoient de nostredit Oncle,
 ils menacent d'interdire le Premier President
 de nostredite Cour de Parlement pour l'a-
 uoir visité. Et au contraire par leurs Arrests
 ils permettent à Luzignan General de leur ar-
 mée, si nostredit Oncle enuoyoit ses gardes
 en sa maison, de repousser la force par la for-
 ce, enjoignant aux Seneschaux, vi Senes-
 chaux, Preuosts, Consuls des Viles & com-
 munautez de tenir la main à l'execution de
 leur Arrest pour armer les peuples contre la
 puissance

puissance legitime du gouuerneur de leur Prouince, & les entretenir dans l'esprit de leur rebellion. Toutes ces actions sont bien esloignees du deuoir de vrais Officiers qui portent la marque souueraine de nostre puissance: Mais plus encore les artifices dont ils se sont seruis pour porter nos sujets à prendre les armes contre nous, faisans semer des bruits quel'on vouloit establir la gabelle dans la Prouince de Guyenne Cependant, lorsqu'ils veulent persuader nos peuples qu'ils desirent leur soulagement, ils donnent des ordres aux Communautez pour leuer des deniers, fournir du pain de munition à leurs troupes, prennent les deniers des cōsignations pour soutenir les frais des gens de guerre, qu'ils auoient mis sur pied. Et enfin outre ces ordres, ils entreprennent leur donner la liberte de la traite des bleds, moyennant vne imposition qu'ils exigent pour aquiter les detes qu'ils ont faites en nous faisant la guerre. Nous n'auons rien obmis du denier d'un bon Roy pour preuenir tous ces mouuemens, ayans enuoyé en nostredite ville de Bordeaux, ledit

C

seur Dargenson Conseiller en nos Conseils pour faire connoistre nos volonte^z à nostre Cour de Parlement. Mais au lieu de deferer aux ordres que nous auons donnez pour establir le repos & la tranquillité dans nostre dite Prouince, ils les ont mesprisez & ont mieux aymé tenter de combattre nos armes, que de nous rendre vne obeissance si legitime. Il ne faut pas s'estonner, si apres toutes les voyes de douceur, nous prenons enfin resolution de nous seruir de la puissance que Dieu nous a donnée pour rendre à nostre Estat la justice que nous luy deuons en cette occasion, de ne pas souffrir vn si dangereux desreglement, qui attaque les droits les plus sacrez de nostre couronne, & qui pourroient enfin esbranler les plus solides fondemens de nostre puissance; Si les Magistrats oublient ce qu'ils nous doiuent: nous sommes obligez comme nous auons esté establis de Dieu sur eux pour leur commander, & qu'ils n'ont autre autorité, pouoir ny iurisdiction que celle que nos predecesseurs Roys, & nous leur auons donnée, Nous sommes dans cette resolution de con-

seruer les priuileges & d'observer religieusement toutes les loix qui ont esté ordonnées pour les maintenir dans la dignité de leurs charges. Mais ce Parlement deuoit considerer que ces loix ne sont pas faites pour destruire la puissance & l'autorité Royale & la mettre dans le mespris, au lieu d'en affermir le respect, il est iuste que les Iuges rendans la iustice soient assurez contre la violence qu'on pourroit exercer contre eux, pour les rendre plus puissans & plus genereux à bien faire, & non plus hardis d'attaquer la Royauté, & de faire ouuertement la guerre à leur Roy lors qu'il leur tend les bras pour les receuoir en ses graces : & les Officiers de ce Parlement se peuuent-ils plaindre de nostre iustice, si apres auoir traité avec tant de mespris nostre autorité, & auoir fait vn si mauuais vsage de la puissance que nous leur auons déposée, nous la retirons de leurs mains, puis qu'en mesme tēps, sans pouuoir, ils entreprennent pour leur interest particulier, d'interdire vne Cour toute entiere de la fonction que nous luy auons donnée. Nous voudrions bien dissi-

muler toutes ces mauuaises conduites : Mais
 nous craignons qu'un si mauuais exemple
 ne donne la hardiesse d'entreprendre con-
 tre nostre autorité. Les actions des Magi-
 strats sont de grande consequence, elles
 passent dans le public, qui croit souuent de-
 uoir imiter ceux qui leur ont esté donnez
 pour leur conduite, que les Habitans de
 nostre ville de Bordeaux ont reconnué si
 mauuaise, qu'ils ont depuré l'un de leurs
 Jurats vers nous, pour tesmoigner la reso-
 lution qu'ils ont prise de demeurer dans l'o-
 beyssance qu'ils nous doiuent, & qu'ils con-
 damnent toutes les resolutions du Parle-
 ment, avec lequel ils ne veulent auoir aucu-
 ne participation de ce qui s'ordonnera con-
 tre le bien de nostre seruice. A CES CAU-
 SES. Del'aduen de la Reyne Regente nostre
 tres-honorée Dame & Mere, nostre tres-
 cher & tresamé Oncle le Duc d'Orleans, &
 de nostre certaine science, plaine puissance
 & autorité Royale. NOUS AVONS
 par ces presentes signées de nostre main
 INTERDIT ET INTERDISONS
 les Officiers de nostre Cour de Parlement
 de

de Bordeaux de tous exercices & fonctions
de iustice, soit en corps ou autrement. DEF-
FENDONS à tous nos suiets de leur res-
sort de les reconnoistre pour Iuges; Decla-
rans des à present tous iugemens, Arrests, &
autres actes qu'ils pourront rendre cy apres,
nuls, & de nul effet & valeur, comme don-
nez par personnes priuées & sans pouuoir, ius-
ques à ce que par nous en ait esté autrement
ordonné. Et d'autant qu'il n'est pas iuste
que les Arrests donnez contre nostre au-
thorité & bien de nostre seruice, & la per-
sonne de nostredit Oncle le Duc d'Esper-
non & ses domestiques, demeurent en leur
force & vigueur: NOVS AVONS cassé
& annullé, cassons & annulons tous les Ar-
rests donnez par nostredite Cour de Parle-
ment de Bordeaux depuis le vingt-cin-
quiesme Ianuier dernier iusques à present,
tant en matiere publique, que contre la per-
sonne de nostredit Oncle le Duc d'Esper-
non & ses domestiques, Commandons aux
Huissiers de nostre Conseil, qu'à ce faire
commettons, de se transporter en ladite
Cour de Parlement de Bordeaux, icelle

D

se tante & assemblée, leur signifier les presentes nosdites lettres d'interdiction, luy faisant commandement d'y obeyr, & aux Officiers d'icelle de sortir de ladite ville de Bordeaux quatre iours apres la signification des presentes, sur peine de desobeyssance, & d'estre procedé contre eux comme rebelles & contreuenans à nos commandemens. EN IOIGNONS à nostre tres-cher & bien amé Oncle le Duc d'Espéron de donner main forte pour l'execution de nostre presente Declaration, & à tous nos autres Officiers & suiets d'obeyr aux ordres qui leur seront faits & par luy donnez à cet effet; Car tel est nostre plaisir. En tesmoin dequoy nous auons fait mettre nostre scel à ces presentes. Données à Compiègne, dattées le 12. iour de Iuillet l'an de grace mil six cens quarante neuf, & de nostre regne le septiesme, Signé Louys. Et plus bas par le Roy, la Reyne Regente sa Mere presente. Philippeaux, & scellé du grand sceau de cire iaune.

L'An mil six cens quarante neuf le vingt-quatriesme iour de Iuillet par nous Pierre Quicquebœuf,

& Nicolas Herbin, Huissiers ordinaires du Roy en ses
 Conseils d'Estat & priué soubsignez la Declaration
 de sadite Maiesté dont copie est cy dessus transcripte, a
 esté monstrée, signifiée, & d'icelle baillé la presente copie
 à la Communauté des Greffiers tant en chef du Parle-
 ment de Bordeaux, Grande Chambre, l'Edit, Tournel-
 le, deux Chambres des Enquestes, Requestes du Palais
 dudit Parlement, que Secretaires de ladite Cour &
 Commis au Greffe d'icelle, Parlant au sieur Suan, Com-
 mis au Greffe l'un d'iceux, trouué en la Salle du Palais
 dudit lieu, à ce qu'ils n'en pretendent cause d'ignorance.
 Et n'ayent à faire aucune signature des Ordonnances,
 Arrests quelconques qui pourroient estre donnez de-
 puis l'interdiction generale faite & signifiée ledit iour
 à nos Seigneurs du Parlement de Bordeaux de l'exerci-
 ce & fonction de leurs charges portées par lesdites let-
 tres de Declaration de sa Maiesté, le tout sur les peines
 y contenuës. Ainsi signé Quicquebauf & Herbin.

